

## Богородичны опустительныя по тропарех святых, глас 6

**В неделю вечера и в понед. на «Бог – Господь»:**

**Н**ачало спасения Гавриилово провещание к Деве бысть, / слыша бо, еже радуйся, и не убеже целования, / не усумнеся, яко Сарра в сени, / но сице глаголаше: / се раба Господня, // буди Мне по глаголу твоему.

**В конец утрени:** Архангельское слово прияла еси, / и херувимский престол показалася еси, / и на объятиих Твоих носила еси, Богородице, // Надежду душ наших.

**В понед. вечера и во вторник на «Бог – Господь»:**

**У**пование мира, Благая Богородице Дево, / Твое и едино державное предстательство просим: / умилосердися на безпредстательственныя люди, / моли Милостиваго Бога / избавитися душам нашим от всякаго прещения, // еди́на Благословенная.

**В конец утрени:** Никтоже, притекаяй к Тебе, посрамлен от Тебе исходит, / Пречистая Богородице Дево, / но просит благодати и приемлет дарование // к полезному прошению.

**Во вторник вечера и в среду на «Бог – Господь»:**

**Б**огородице Дево, моли Сына Твоего, / волею пригвоздившагося на Кресте / и мир от прелести свободившаго, Христа Бога нашего, // помилувати души наша.

**В конец утрени:** Прежде век от Отца без матере рожденна, / Сына и Слова Божия, / в последняя лета родила еси, / воплотившагося от чистых кровей Твоих, Богородительнице, без мужа. // Егоже моли дароватися нам грехов оставлению прежде конца.

## Богородичны опустительныя по тропарех святых, глас 6

**В среду вечера и в четверток на «Бог – Господь»:**

**С**вятая Владычице, Чистая Бога нашего Мати,/ всех Творца неизреченно рождающая,/ моли со апостолы священными всегда благодать Его,/ страстей нас избавити// и оставление нам дати грехов.

**В конец утрени: Великих дарований, Чистая Дево Богомати,/ Ты сподобилася еси, яко родила еси плотию/ Единого от Троицы, Христа Жизнодавца,// во спасение душ наших.**

**В четверток вечера и в пяток на «Бог – Господь»:**

**Б**огородице Дево, моли Сына Твоего,/ волею пригвоздившагося на Кресте/ и мир от прелести свободившаго, Христа Бога нашего,// помилувати души наша.

**В конец утрени: Прежде век от Отца без матере рожденна,/ Сына и Слова Божия,/ в последняя лета родила еси,/ воплотившагося от чистых кровей Твоих, Богородительнице, без мужа.// Егоже моли дароватися нам грехов оставлению прежде конца.**

**В пяток вечера и в субботу на «Бог – Господь»:**

**П**редповествует Гедеон зачатие/ и скажет Давид Рождество Твое, Богородице:/ сниде бо, яко дождь на руно, Слово во чрево Твое,/ и прозябла еси без семени,/ земле святая, мира Спасение,// Христа Бога нашего, Благодатная.

**В конец утрени: Прежде век от Отца без матере рожденна,/ Сына и Слова Божия,/ в последняя лета родила еси,/ воплотившагося от чистых кровей Твоих, Богородительнице, без мужа.// Егоже моли дароватися нам грехов оставлению прежде конца.**